

白居易

牛僧孺

竹居狹廬

全唐文

卷六百八之六百八十二

白居昌 牛僧孺


竹居致康



全唐文 卷一百一十五

欽定全唐文卷六百八十目錄

白居易 二十五



唐故溧水縣令太原白府君墓誌銘 并序

大唐故賢妃京兆韋氏墓誌銘 并序

唐河南元府君夫人滎陽鄭氏墓誌銘 并序

唐故坊州鄜城縣尉陳府君夫人白氏墓誌銘 并序

海州刺史裴君夫人李氏墓誌銘 并序

故鞏縣令白府君事狀

襄州別駕府君事狀

醉吟先生傳

季冬薦獻太清宮詞文

禱仇王神文

祝皋亭神文

祭龍文

祭淞江文

祭崔相公文

祭崔常侍文

欽定全唐文卷六百八十

白居易 二十五

唐故溧水縣令太原白府君墓誌銘

并序

公諱季康字某太原人秦武安君起之裔胄北齊五兵尚
書建之五代孫也曾祖諱士通皇朝利州都督祖諱志善
尚衣奉御父諱鑄揚州錄事參軍公卽錄事府君次子歷
華州下邳尉懷州河內丞徐州彭城令江州潯陽令宿州
虹縣令宣州溧水令歿於官舍明年某月某日歸葬於華
州下邳縣某鄉某原享年若干嗚呼公爲人溫恭信厚爲

官貞白嚴重友於兄弟慈於子姪鄉黨推其行交游讓其才自尉下邳至宰溧水皆以潔廉通濟見知郡守流譽於朋寮才不偶時道屈於位而徒勞於州縣竟不致於青雲命矣夫哀哉公前夫人河東薛氏先公若干年而歿生二子一女女號鑒虛未笄出家長子某杭州於潛尉次子某睦州遂安尉後夫人高陽敬氏父諱某某官生一子二女女皆早天子曰敏中進士出身前試大理評事歷河東鄭滑邠寧三府掌記夫人在室以孝敬奉親爲淑女旣嫁以柔和從夫爲順婦及主家以慈正訓子爲賢母故敏中遵

其教飭其身升名甲科歷聘公府以文行稱於衆以祿養
榮於親雖自有兼才然亦由夫人訓導之所致也夫人以
太和七年正月某日寢疾終於下邳別墅享年若干明年
某月某日啟溧水府君薛夫人宅兆而合祔焉禮也時諸
子盡歿獨敏中號泣襄事託從祖兄居易誌於墓石銘曰
繫我叔父溧水府君治本於家事施政於縣民繫我叔母
高陽夫人德修於室家慶積於閨門訓著趨庭善彰卜鄰
故其嗣子休有令聞

大唐故賢妃京兆韋氏墓誌銘

并序

德宗聖文神武皇帝元妃韋氏諱某字某京兆人也曾祖某某官祖某某官父某某官妃卽某官府君第某女也母曰永穆公主元和四年四月某日妃薨於某所以某年四月某日詔葬於萬年縣上好里洪平原上悼焉哀榮之禮有以加焉嗚呼惟韋氏代德宦業族系婚戚有國史家牒存焉今奉詔但書地及時與妃之所以曰賢之義而已貞元中沙鹿上仙長秋虛位凡六十九御之政多聽於妃妃先以采蘋之誠奉於上故能致霜露之感薦於九廟次以樛木之德逮於下故能分雲雨之澤洽於六宮其餘坐論

婦道行贊內理服用必中度故組紉有常訓言動必中節
故環珮有常聲七十二年禮無違者冊命曰賢不亦宜哉
永貞中號奉宮車誓留園寢麻衣告朔蓬首致哀執匪懈
之心視奠於靈座修無上之道薦福於崇陵殆茲歿身不
衰其志故葬之日掌文之臣白居易得以無媿之詞誌於
墓而銘曰

京兆阡兮洪平原兮歲已丑兮日丁酉兮惟土田兮與時
日龜兮蓍兮偕言吉哉新墳兮葬者誰德宗皇帝韋賢
妃

唐河南元府君夫人滎陽鄭氏墓誌銘 并序

有唐元和元年九月十六日故中散大夫尚書比部郎中
舒王府長史河南元府君諱寬夫人滎陽縣太君鄭氏年
六十寢疾歿於萬年縣靖安里私第越明年二月十五日
權祔於咸陽縣奉賢鄉洪瀆原從先姑之塋也夫人曾祖
諱遠思官至鄭州刺史贈太常卿王父諱瞤一作瞤朝散大
夫易州司馬父諱濟睦州刺史夫人睦州次女也其出范
陽盧氏外祖諱平子京兆府涇陽縣令夫人有四子二女
長曰沂蔡州汝陽尉次曰秬京兆府萬年縣尉次曰積同

州韓城尉次曰稹河南縣尉長女適吳郡陸翰翰爲監察御史次爲比邱尼名真一二女不幸皆先夫人歿府君之爲比部也夫人始封滎陽縣君從夫貴也稹之爲拾遺也夫人進封滎陽縣太君從子貴也天下有五甲姓滎陽鄭氏居其一鄭氏勲德官爵有國史在鄭之源派婚姻有家牒在比部府君世祿官政文行有故京兆尹鄭雲逵之誌在今所敘者但書夫人之事而已初夫人爲女時事父母以孝聞友兄姊睦弟妹以悌聞發自生知不由師訓其淑性有如此者夫人爲婦時元氏世食貧然以豐潔家祀傳

爲貽燕之訓夫人每及時祭則終夜不寢煎和滌濯必躬親之雖隆暑沍寒之時而服勤親饋面無怠色其誠敬有如此者元氏鄭氏皆大族好合而姻表滋多凡中外吉凶之禮有疑議者皆質於夫人夫人從而酌之靡不中禮其明達有如此者夫人爲母時府君旣歿積與稹方鬻鬻家貧無師以授業夫人親執詩書誨而不倦四五年間二子皆以通經入仕稹旣第判入等授秘書省校書郎屬今天子始踐阼策三科以拔天下賢俊中第者凡十八人稹冠其首焉由校書郎拜左拾遺不數月讜言直聲動於朝廷

以是出爲河南尉長女既適陸氏陸氏有舅姑多姻族於是
是以順奉上以惠逮下二紀而歿婦道不衰內外六姻仰
爲儀範非夫人恂恂孜孜善誘所至則曷能使子達於邦
女宜其家哉其教誨有如此者旣而諸子雖迭仕祿秩甚
薄每至月給食時給衣皆始自孤弱者次及疎賤者由是
衣無常主厨無異膳親者悅疎者來故傭保乳母之類有
凍餒垂白不忍去元氏之門者而况臧獲輩乎其仁愛有
如此者自夫人母其家殆二十五年專用訓誡除去鞭扑
常以正顏色訓諸女婦諸女婦其心戰兢如履於冰常以

正辭氣誠諸子孫諸子孫其心愧恥若撻於市由是納下
於少過致家於太和婢僕終歲不聞忿爭童孺成人不識
櫝楚閨門之內熙熙然如太古時人也其慈訓有如此者
噫昔漆室緹縈之徒烈女也及爲婦則無聞伯宗梁鴻之
妻哲婦也及爲母則無聞文伯孟氏之親賢母也爲女爲
婦時亦無聞今夫人女美如此婦德又如此母儀又如此
三者具美可謂冠古今矣嗚呼惟夫人之道移於他則何
用而不臧乎若引而申之可以維一國焉則關雎鵲巢之
化斯不遠矣若推而廣之可以肥天下焉則姜嫄文母之

風斯不遠矣豈止於訓四子以聖善化一家於仁厚者哉
居易不佞辱與夫人幼子稹爲執友故聆夫人美最熟稹
泣血號慕哀動他人託爲撰述書於墓石斯古孝子顯父
母之志也嗚呼斯文之作豈直若是而已哉亦欲百代之
下聞夫人之風過夫人之墓者使悍妻和嚚母慈不遜之
女順云爾銘曰

元和歲丁亥春咸陽道渭水濱云誰之墓鄭夫人

唐故坊州郿城縣尉陳府君夫人白氏墓誌銘

并序

夫人太原白氏其出昌黎韓氏其適潁川陳氏享年七十

唐和州都督諱士通之曾孫尚衣奉御諱志善之元孫都
官郎中諱溫之孫延安令諱鏗之第某女韓城令諱欽之
外孫故鄜城尉諱潤之夫人故潁川縣君之母故大理少
卿襄州別駕諱季庚之姑前京兆府戶曹參軍翰林學士
白居易前秘書省校書郎行簡之外祖母也惟夫人在家
以和順奉父母故延安府君視之如子旣笄以柔正從人
故鄜城府君敬之如賓自延安終夫人哀毀過禮爲孝女
洎鄜城歿夫人撫訓幼女爲節婦及居易行簡生夫人鞠
養成人爲慈祖母迨乎潔烝嘗敬賓客睦娣姒工刀尺善

琴書皆出於餘力焉貞元十六年夏四月一日疾歿於徐州古豐縣官舍其年冬十一月權窆於符離縣之南偏至元和八年春二月二十五日改卜宅兆於華州下邳縣義津鄉北原卽潁川縣君新塋之西坎從存歿之志居易等號慕慈德敬撰銘誌泣血秉筆言不成文銘曰

恭惟夫人女孝而純婦節而溫母慈而勤嗚呼謹揚三德銘於墓門恭惟夫人實生我親實撫我身欲養不待仰號蒼旻嗚呼豈寸魚之心能報東海之恩

海州刺史裴君夫人李氏墓誌銘

并序